

## Su Kedua' Sulat ni JUAN

Naa ki kedua' sulat ni Juan kini, iini piwitanen dun “su petailen Libun.” Naa, nda' ta suunay sa' libun tantu samasakup ni Juan dini Kristu begudiin, sa' samingay. Naa duuni minilung dun laungen samingay, ma'ananen laung sala pikumpulan nu nga sakup ni Kristu. Tinitulu' dini ni Juan pu' subay mekpinetailay su nga sakup ni Kristu. Duun dademai maika' tinitulu'en mekatag di nga mekpetu'un dig balus.

<sup>1</sup> Ditu ni'a, petailen Libun muka' ditu ngag bata' mu. Iini suminulat dun diniu, ki megulang niu kini. Mikpetailu gupia diniu. Muka' kana' laak naan, pu' sug launan suminakup tu metuud, mikpetail dailan dema diniu, <sup>2</sup> pu' samasakup ita tu metuud. Su metuud, ndi' na mawa' dinita, nda'i gikteben.

<sup>3</sup> Penenebiin ku, tulungen ita nu Gama' ta Megbebaya', muka' nug Bata'en si Isukristu, petailen ita niin sampay begayan ita niin pianan ginaa, sa' pegdunutan ta su metuud muka' mekpinetailay ita.

### *Su Metuud muka' su Kekpinetailay*

<sup>4</sup> Naa, bena' misuunan ku pu' su ngag duma bata' mu, pegdunutan nilan su metuud, maa' dadema nu pinalinta nu Gama' ta dinita, liliagu dun gupia. <sup>5</sup> Kelelaat dini'a, petailen Libun,

mekpinetailay ita, launan ta. Pu' iini palintau diniu sug daan, su midengeg ta kanugdiin sampay nandaw, kana' begu palinta. <sup>6</sup> Pu' iini kepetail ta tu Megbebaya', su kekpetuud ta tu nga pinalintanen. Kaas pinetailay amu, launan niu, pu' kiin demai pinalinta diniu kanugdiin sampay nandaw.

<sup>7</sup> Naa, duun nai melaun mekpetu'un dig balus mileep dig lumbang kini, pu' pemelaun nilan pu' kana' laung kuminilawan si Isukristu. Adin su mekpetu'un ma'antu, iini mikpetu'un dig balus. Muka' iin dademai kumontra dini Kristu. <sup>8</sup> Tubuday niu, pu' mbuus, mekpelilu sug lasay nami diniu. Sa' ma'antu, ndi' niu malap sug launan sugda nu Megbebaya' sia diniu.

<sup>9</sup> Adin su getaw dinuganganen su tinitulu' ni Kristu, kaas miksuyay dun, iin kana' na sakup nu Megbebaya'. Adin pelum su nda' suay tu tinitulu' ni Kristu, iini suminakup gusay tu Gama' ta sampay tug Bata'en. <sup>10</sup> Kaas sa' duuni meditug balay niu mekpetu'un, asa misuay tu metuud su tinitulu'en, ndi' niu penemba'ay muka' ndi' niu pepenakay. <sup>11</sup> Pu' adin su menemba' di ma'nia, mipeduma diniin mekesala'.

### *Nga Katapusan Pemuun*

<sup>12</sup> Melaun pai telu'en ku sia diniu, laak pauku sumulat dun, pu' iini mauya'an ku, mengumbe-layanu sia ditu niu, adun megabitabit ita gupia, muka' leliagen ita dun.

<sup>13</sup> Simbayan ka nu ngag bata' nu petailen mimated dini'a dini.

**Kig Begu Pasad: Ki talu' nug megbebaya'  
(Bagong Tipan: Maayong balita alang  
kanimo)  
Subanen, Central: Kig Begu Pasad: Ki talu' nug  
megbebaya' (Bagong Tipan: Maayong balita alang  
kanimo) New Testament**

copyright © 1993 Wycliffe Bible Translators, Inc.

Language: Central Subanen

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 22 Feb 2024 from source  
files dated 29 Jan 2022

e39efc58-c45f-53c6-990e-d3cd833e20b4